



# CYMA Football leh Basketball

## Tournament atan inbuatsaih ngawrh

**Chanmari West, May 13 :** Chanmari West Branch YMA chuan Central YMA-ina Football leh Basketball Tournament a buatsaih turah ngawrh takin inbuatsaihna a kalpui mek a ni. Branch YMA Committee chuan inbuatsaihna atan member tinah Rs 10 aia tlem lo thawh turin ruahmanna a siam a, hei hi section ten bawhzuiin, an khawn a ni.

Football Coach atan veng pawn lam mi rawih tumin hma lak a ni a, mahse ruahman anga thil a kal tuan theih loh avangin harsatna a awm a, Organising Committee lamin ruahmanna thar a siam thuai beisei a ni. Football hi zing karah High school field-ah practise thin niin, veng tana theihtawp chhuahtu player-te an fakawm viau rualin player thenkhat inthlahdah tak tak an la awm chu a paw hle. Tun aia thahnemngai leh zual turin player zawng zawngte an inpek thar a ngai a, Branch-in a ngen.

Ni 11.5.2012 khan Zarkawt recreation Centre-ah Basketball tournament hawngin an khel tan tawh a, team 61 an chhuak. Basketball manager atan Zonunsanga (Patea) leh Coach-ah Henry Lalremruatpuiate an ni a, anni

team hi pool 'D' ah awmin Ni 18.5.2012 hian Zarkawt Recreation Centre-ah Armed Veng team nen an inkhel dawn a, he hunah hian veng mipui a tam thei ang berin tawiawm ni thei se a tha hle.

Heng mite hi Chanmari West Branch YMA Basketball teamte an ni.

1. C. Lalfamkima Asst. Coach.
2. Lalremruata Renthlei.
3. Lalremruata
4. Lalmangaihzuala
5. Steve Lalromuanpuia Sailo
6. Lalfluangliana
7. Zothanmawia Khiangte
8. Vanlalnghaka
9. K. Lalhmunsiam
10. Ramengmawia
11. Vanlalpeka
12. VL Fakhlena

## Naupang khawngaihthlak Lalduhawmi

Tunlaia Aizawl khawpuiin a buaipui chu kan veng naupang, khawngaihthlak Sarah Lalduhawmi hi a ni ngei ang. Lalliantluanga leh Rohlupuiite fanu a ni a, a pa hian a boral san tawh a ni. Zotlangah an awm thin a, an in chungpain kut a thlak avangin a spinal cord a chhia tih hmuhchhuah a ni a, a spinal cord-a thisen tlingin cancer a siam tih hriat a ni leh a, tunah hian a nghawng hnuai lam zawng chu a zeng a ni.

He naupang khawngaihthlak tak hi Ni 4.4.2012 khan a pain a boral san hnu lawkah, a pi Laibati In Neuva Section, an rawn bel a. Chanmari West Branch YMA chuan Sarah-i hi Branch hmingin an kan a, Neuva Section YMA pawhin an kan tawh bawk a ni. Veng hrang hrang atangin an tanpuia, New Life Hospital Variety Store, Chanmari, Waiting shed, Chanmari leh Gemini Enterprises kawtah bawm dawh a ni bawk.

## NGENNA

YMA Park-ah hian Motor leh thildang dah phal loh a nih laiin tunlai hian motor leh In sakna bungrua rawra, thingzai dah a ni a, dah thinte hian lo dah tawh lo turin leh thildahte aranglama senghawi turin kan in ngen a, dah luih a la nih chuan engpawh lo tawk ula in sawi buai thei lovang.

### Branch News

Tunkar Ni 15.5.2012 (Thawhle) zan khian Branch Executive Committee meeting tum a ni.

Central YMA in Inter Branch YMA Tournament a buatsaih turah inbuatsaih zel a ni a, Ni 18.5.2012 (Zirtawp) Dar 1 khian kan Branch Basketball Team leh Armed vengte an inkhel dawn.

Ni 6.5.2012 (Sunday) zan dar 12 vel khan Sairang Road-ah Zu 300 Lts vel man a ni a, a neitute hi Vaivakawn Police hnenah hlan an ni.

Ni 9.5.2012 (Nilai) zing dar 4 vel khan Pi Vanlalsawmi (Hunthar area) a mi te in atangin Zu 5 Bottles man a ni a, a neitu hi Thana Police te hnenah hlan a ni.

Central YMA Tournament neih turah member te hnena thawhlawm khawn kha vawin hi Branch Fin. Secretary hnena thehluh hun tiam a ni a, la thehluh lo ten thehluh zel turin kan in ngen e.

Tv H.Lalnunzira 'T' Section a mi chuan Football Team inbuatsaihna atan a Ball 3 tlawm taka min lei tir bakah, 1 a rawn pe leh a, a chungah lawmthu sawi a ni.

Kan Branch YMA Football Player Laltanpuia chu Ni 11.5.2012 zing khan an practice na-ah a kawng a ti na a, a dam leh thuai kan beisei.

Sara-i 'N' Section damlo chu Branch YMA hminga kan a ni.

### PEM LUT

1. Pu C. Biakkunga te chhungkua chu Vaivakawn atangin Pi Lianhipi 'CH' Section te In ah.



### TUNKAR CHANGVAWN

*"Thlarau chu timit suh ula, thuhritelte hmusit suh u, engkim fiah zawk ula, a tha apiang pawm tlat ula."*

*I Thessolonika 19 -21 8:11,12*

**Editorial Board**

<b>Editor:</b>	J.Lalnangliana	9862399658
<b>Joint Editor :</b>	Lalchhandama	9862358347
<b>News Editor :</b>	Thangkhuma	9862303135
	R. Lalrinnggheta	9862358337
	Jacob Lalrinsanga	9612319779
<b>Cir.Manager :</b>	Johny Lalthanpuia	9612359161
	EVL. Hruaitluanga	9862655426
<b>Production Manager :</b>	R.Lalmachhuana	9436151817

**Branch Office Bearer**

<b>President</b>	T. Ngurkhuma	9436190843
<b>Vice President</b>	R. Lalmachhuana	9436151817
<b>Secretary</b>	RL. Thanhnuna	9436152760
<b>Asst. Secretary</b>	Zairemmawia	9862385654
<b>Treasurer</b>	C. Lalzarliana	9436142049
<b>Fin.Secretary</b>	K. Darthantluanga	9436196071
<b>Adviser-te :</b>	Pu Lalbiakthanga Khiangte	
	Pu Rothuama, Pi Zamanthangi	
	Pu Lalrengpuia Sailo	

**Article :**

kar hmasa chhunzawmna

**YMA NIHPHUNG LEH HRUAITUTE MAWHPHURHNA**

R.L.Thanhnuna, Secretary CWBYMA

**3. HRUAITU NIHNA**

Pawl a kan lo insiam hian hruaitu neih a tul a. Pawl chak leh chak lohna hi hruaitute tlin leh tlin lovah thui tak a inngat a ni. Hruaitu dinhmun a ding thenkhat chuan a hna leh mawhphurhna lam thawk peih lova, a nihna duh avanga hotu anga awm tum kan awm fo thin. YMA ah hian hotu kan awm lova, hruaitu kan ni tih hi kan hriatreng a tul. Hruaitu ni lova hotu nih duh hi chuan pawl a ti chak lo thei a, pawlin harsatna leh bahlahna a lo neihin tute emaw dem kual a, mawhphurhtir tur kan zawng leh ruai thin a ni. Hruaitu tling chuan an pawlho tan tha leh zung, sum leh pai thlengin an seng huam a, pawl thiltih that leh hmingmawina a lo thlen changin, thiante avang a ni tiin midangte a chawimawi a, pawl thiltih sualah leh hlawhchhamna harsatna a lo thlen chuan amah leh amah thiam loh a in chantir a, a mawh a la ngam thin. Hruaitu tha lo leh tling lo chuan pawl thiltih thatah "ka" an tizing dup a, a tha lo lamah erawhchuan "an" "in" emaw a ti hlauh thung.

Hruaitu nihna leh dinhmun heng atang hian mahni theuh i lo in enfiah dawn teh ang u.

**1. Hruaitu chu tihtak zeta thil ti mi a ni :** Eng pawl pawh hian thiltha tih kan tum theuh a, a hlawhtlinna chu a thawktu a zir a ni fo. Hruaitu berin tihtak zeta thil a tih chuan tumah an dawngdah ngam lo. Tih tur rela pass zet a, zuzi san leh hruaitu dinhmun a ding chuan reiloteah hruai tur a nei lo mai thin.

**2. Hruaitu chu a insiamrem thiam tur a ni :** Kan khawvel hi a inher danglam chak em em a, naupang thanglian zelte hi an fing chakin an rilru thlek hmang leh zeiziate pawh a danglam chak em em a ni. Hruaitu chuan henge te hi a hmuthiam tur a ni a, hun inher danglam zelah, a in siamrem thiam tur a ni.

**3. Hruaitu chu mi dawhtheih a ngai :** Mi tam tak chu kan dawhtheih loh avangin kan hlawhchham fo. Hruaitu chu sawiselna karah pawh tuang tihchhah a ngaih hunah tichhah a, rilru kawih her mai mai theih loh, nghet taka ding thei mi nih a ngai.

**4. Mahni inthunun :** Tanpui ngaite tanpuitu kan nih rual hian, sual kan dova, thil tha lo tih kan khap a, chhiatna a min hruai lut thei thil kalsan tul hun a awm. Hruaitu chu entawn tlak in a awm hram hram tur a ni.

**5. Sawiselna hlawkpui :** Hruaitu nih hi a famkim lova, thil a ti diklo ve thei a, midangin an sawisel pawhin a ngaihtuah a, insiamthat a tul a ni tih hriain haw mai lovin kawng dik leh thu dik ngaihtuahin chung sawiselna te chu a tan hlawkna a ni zawk hlauh thin a ni.

**6. Midang chher chhuah :** Hruaitu chuan mahni hmasial lova, a awm loh hnu pawha fel taka pawl hruaitu tur a chher chhuak thin tur a ni. Hruaitu tha chuan a awm loh hun pawh a hruaitu tha a chher chhuah loh chuan hruaitu tha tak tia sawi harsat chang a awm fo thin.

**7. Hmahruaitu :** Hruaitu chuan hnathawhah te, thawhlawm thawhah te, rorel kenkawhah leh bawhzuina kawngah te, sual dona kawngah te leh thil tha tihna kawng tinrengah hma hruaitu a ni fo tur a ni. Kawktu leh mite thawh atana reltu ni lovin a taka hma hruaitu a ni thin tur a ni.

**8. Hna sem :** Hruaitu chuan thil zawng zawng a maha tih a tum chuan a in daih thei lo. Chuvangin hruaitu tha chu hna semzai thiam, mite rinna chang hria leh rin tur tha hre mi nih a ngai.

**9. Taimakna :** Hruaitu kan nih ang ngeiin kawng tinrengah membete aiin kan taima in, hma kan hruai thin tur a ni. YMA hruainaa Qualification pawimawh ber chu taimakna hi a ni. Kan membete hian hruaitu nge kan nih hotu tih hi min chikna a ni fo thin. Hnatlan nikhua a hotu ang mai a kawh kual reng mai leh membete tirh ngawt hi YMA ah hi chuan a remchang lo fo tih kan hriat a, a rimchhe lai, a hrehawm lai leh a pik lai tawn hmasa ngam hruaitu kan nih a pawimawh hle.

**10. Committee thurel ngaih pawimawh :** Hruaitu mawhphurhna pawimawh tak pakhat chu Committee ngaih pawimawh a ni. Committee a kan rel fuh chuan hmasawna tak tak a tling a, kan rel fuh loh erawhchuan pawl chhiatna leh mualphona a thleng thei. Heti taka pawimawh a nih avang hian Committee ngaih pawimawh loh hi a pawi hle a ni. Pumpelth theih loh rokhawlhna kan nei a nih chuan, pawngpaw thulh mai lovin kal theih loh tur thu hriattir thin a tha. Committee a hun taka tan leh a hun taka kal thin hi mi puitling nihna pakhat a ni. Tin, hruaitu kan nih chuan Committee-ah ngaihdan sawi thei tura ngaih kan ni a, thenkhat chu ngaihdan pawh sawi

(Phek thumnaah zawm..)

**Editorial :**

Kan veng chhungin naupang khawngaihthlak, veng dang pawhin an buaipui luai luai kan nei a, veng neitu ten nasa tak leh duat taka kan enkawl angai a ni. Tunlai thalai lam chuan facebook atangin an inhrilh darh a, tualchhung chanchinbu lian pawn an chhuah chuai chuai bawk a, tanpui chu an ngai a ni.

Mi thahnemngaiten tanpuina an ruahmana, hei mai hi duh tawk lovin, nasa zawka chetchhuah hi veng chhung chuan kan tum angai a ni. Chumai ni lovin an dinhmun chhiat vanga dikna leh an zahawmna humhim theih loh hi a pawi a, mi thiltitheih leh milian annih vang ngawta hrem leh dan chung a leng niawm taka awm anga an lang hi a pawi a ni.

Zirlai ten an thawhrah an seng mek a, hlawhtling ten an kawng zawh leh tur an thlan thiam a, an tuina leh eizawna tling an zawh thiam angai a, an dinhmun atanga an hmasawn leh dan tur pawh an inhriat a tha khawp ang. Chutih rual erawh chuan la hlawhtling ve rih lo te hian beidawng mai lova, hmalam pan a, bei la bei nawn rawh tih leh ka tum nge ruh saruh ti a, an insan phek angai a ni. Vawikhat hlawhchhamah mai zam lo leh tluchhe lovin, a aia thaa an tih theih a pawimawh hle a ni.

**2012 Thuvawn**

*I awmdan tur chu  
LALPA chungah ngat  
la; Amah chu ring la,  
aman a ti vek ang.*

### VANAPA

☞ An Member Pi Juliet Lalengkimi chu National Arm Wrestling Championship neih zawh takah a weight category-ah 3-na niin, National Referee-ah a tling nghal bawk.

☞ An Section chhungah Zu thahnem tak man a ni chu pawl an tiin hetiang hi thleng tawh lo se an ti hle.

☞ An hruaitu Tv Vanlalhriata, Pu R. Vanlalsawma leh Pu Lallianzauva te Life member thar an ni.

☞ Ni. K. Zonunmawid/o K. Lawmsanga chuan HSSLC-a pass thar.

☞ An Leader Pu VL Thakima leh an hruaitu Pu Francis Lalrindika (Sena) te chu Arunachal Pradesh (Basar)-ah North East Cultural Festival hmang turin a thang mek.

☞ Nimin zingkar khan YMA Chhang ten Section chhung thenfai hnatlang an nei.

### CHAWNGBAWLA

☞ Kawipuia Gas la turte tana hriat tur **Gas extra chan dan tur** : Gas sem hnuhnun ber tuma eng emaw harsatna emaw rokhawlhna avanga la thei lo an awm chuan sem leh hunah duhsak hmasak an ni ang a, a bak chuang a la awm anih chuan a number indawtin sem thin a ni ang.

### KHUANGCHERA

☞ Ni 6.5.2012 (Pathianni) tlai khan section huamchhungah Rakzu man a ni, section huamchhungah hruaitute Duty thin a ni a, mipuite tawiawmna an gen.

☞ Section member veng tana Basketball leh Football khel turte thahnemngai taka practise turin an chah.

☞ Hun remchang hmasaah Zawlbuk leilaih hnatlang (sumtuaknan) koh tum a ni a, member atam thei ang ber thawkhhuak turin an inngen.

☞ Ni 12.5.2012 (Inrinni) zingkar khan YMA Chhang leh hruaitute'n Section chhungah fanai hnatlang an nei.

☞ Member tina Rs 10 khawn chu zawh fel tawh a ni a, chutih rual chuan, member thenkhat thawh duh ve lo an lo awm chu section chuan tha lo a ti hle.

☞ An hruaitu Ni Zosangzuali leh member thenkhatte chu ZCC hmingin Arunachal Pradesh (Basar)-ah North East Cultural Festival hmang turin a thang mek.

### NEUVA

☞ Ni 6.5.2012 zanah khan Sairang road-ah Zu litre 300 vel man a ni a, Zirtawp tlaiah pawh khan sap zu 6 bottle man a ni leh bawk a, section chhungah hetiang ang man tur awm thin hi pawl an ti hle.

☞ Ni 13/5/2012 tlai hian Section YMA hruaitute leh Sairang Road Motor Servicing Association te nen Pasaltha Neuva Inah inkawmho paha thingpui in ho tum a ni a, section hruaitute kim taka kal tur a ni.

☞ Sarah Laldubawmi damlo chu a dam leh thuai theih nan duhsakna an hlan.

### TAITESENA

☞ Section hruaituten mahni bial theuhah House No leh Name plate la nei lote zawn fel thuai tur a ni.

☞ Section chhunga chhungkawtinten mahni in vawn fai theuh tur a ni.

☞ Nimin zingah faina hnatlanga YMA chhang thawk chhuak zawng zawngte chungah lawmthu an sawi.

mualpho zawng a sawi vak thin te hi hruaitute tih tur a ni lo. Hruaitute zingah hman lo tak tak, thildanga buai tak te a awm theih a, thil engkimah an lang hman lo ang, chutiang kara midang harsatna hrethiam duh lo leh a mualpho zawng phut tlat thin YMA hruaitu leh member nih a tha lo.

**d) Inkawp lutuk** : Hruaitu bawr thenkhatah thawhpuite leh memberte leng lek lova inkawm ngeih lutuk te, inkawp bik lutuk te hi a that rualin that lohna a awm theih avangin a chin tawh hriat thiam a tul hle.

**e) Ngaia neih** : YMA hruaitu nih hi ngaia neih a awl hle. Kan mawhphurhna hi thla tin kumtin a thar zela lak thiam a pawimawh. Kan lo tih tawh thin a nih avanga kan phur surh lo a nih pawhin, midang phur taka ti turte tihhual rawihna tur siam loh hram a tha. Ngaia neih tawh avangin hmalakna turah in thlahdah a awl hle, kan thawh hi mahni tana thawk kan ni lo a, midangte tana thawk leh malsawmna an lo dawna atana thawk kan ni tih i hre reng ang u.

A tawp berah chuan, YMA hi tlawmngai pawl, hlawh pawh awm lova tlawmngaihna a hruaitu kan ni a. Heti chung hian hruaitu tha kan nih theihna tur chuan thalaite rilru put hmang hre chung leh ngaihtuah chungah kan khawtlang leh ramin hma a sawn theih nana thalaite hruaitu kan nihna theihngihl lova, 'Waviina thalaite hi kan hruaitu turte an la ni dawn a ni' tih ngaihtuahna nena kan hruaitu nihna kan hriatreng a, midangte tan malsawmna ni ngei hi angai a ni.

(Phek hnihna article zawmna..)

lova thu tluan thak thak kan awm thin. Tin, thurelah kan ngaihdan a tluk loh change hian kan rel a nih miau avangin kan pawm thiam tur a ni. Hruaitu thenkhat chu a ngaihdan a tluk loh avanga hmundanga sawi thin leh bawhzui phur lo an awm thin, hei hi hruaitute tan chuan kan tih loh tawp tur a ni. Tin, Committee a kan thurelte hmundanga lo sawi chhuak thinte a awm theih a, hruaitu chuan zep tur leh puanzar awm chu a thliar fel thiam tur a ni.

Tin, hruaitu tha chuan a rel a ngaihdan pawimawh tluk chiahin thurel bawhzui a taima thin. President / Leader mawhphurhna a awm a, Secretary mawhphurhna leh OB dang mawhphurhna leh Committee Member te mawhphurhna turte pawh rel chang a awm thin a, mawhphurhna nei tura ruat ten tha taka kan hlenchhuah hian hruaitu tha nihna pakhat chu a ni.

**11. Hruaitu chuan pawl thil tum a hre tur a ni** : YMA hruaitu chuan YMA thil tum a hre reng tur a ni. kan pawl thil tum kan hriat loh chuan engtingge kan memberte kan hruai that theih ang. Hruaitu chuan "Tanpui ngaitan tanpuitu" thuvawna neitu kan nihna te, kan pawl thil tum leh a dinchhan pathum - Hun awl hman that, Zofate hmasawmna ngaihtuah, Kristian nun dan tha ngaihsan te hi kan hre reng tur a ni.

### 4. HRUAITU CHAK LOHNA

**a) Chapona leh mahni chauh in rinna** : Hlawhtlinnaah chapo a awl hle, mi min fakna reng reng hi mahni inhmuh ropui nante, midang sit phah nante hman a hlauhawm. Thawhpuite aia fing leh hre zawk a inhmuh te hi chetsualna awlsam tak a ni. Hruaitu fel leh tha thiamna sang deuhte, hruaitu senior leh kum tam deuhte zingah midang rin tawh lohna leh mahni ngeiin tih kher duhna a awm awl a, chu chu thawkho zingah harsatna siamtu a ni thei tih hriatreng a ngai.

**b) Lar duhna** : Mitin hian lar hi kan duh thlangpui theuh awm e, hei hi mitin thinlungah hian a awm hlawm a ni. Hruaitu tha chu a that avangin a lar lo thei lova, mahni intih lar tumna erawh sual hnathawh a ni thei. Lar duh avanga hruaitu nih chuh a awm theih a, chuting mite chuan chet sual hun an nei chawh thin.

**c) Itsikna leh thiante rel** : In itsikna hi hruaitute zingah a awm thei a ni. Thawhpuite itsik emaw dinhmun tha deuh an chan avanga thik emaw hi hruaitu chak lohna hlauhawm tak a ni. Miin kan thawhpuite an chak lohna lai leh an rahpelhte an sawi lo sawi zawmpui mai a awl hle. Miten kan thawhpuite rel leh sawichhiat an tum pawhin kan lawm zawng a ni lo tih an hriatthiam tur zawng a tha. Tin, thawhhona kawngah inphut lutuk avangin thawhhona a chhe thei tih pawh kan hriatreng a ngai a ni. Engemaw hlekah hruaitu te zingah a awm lo a

**Central YMA**

☞ Central YMA leh ATI tangkawp buatsaihin New Secretariat Complex-ah Cement Mistiri Training buatsaih a ni a, a hawna inkhawmah Pu Z. Dengthansanga CEC leh Pu Vanlalmuana Pautu CEC te an tel. He Training hi Aizawl khawpui chhung Branch tana buatsaih a ni.

☞ Ni 10.5.2012 : Central YMA OB leh Project/Industry Study Group, CYMA ten Mizoram Public Investment Board te chu an Chairman Pu Vanhela Pachuau IAS, Chief Secretary hovin a Conference Hall-ah kawm a ni a, hetah hian ram pawn Industry laklul chungchang ngun taka sawiho a ni.

☞ Ni 11.5.2012 : Mizoram Oil Tanker Association hruaitute leh Central YMA OB te Petrol pawlhdal chungchangah an inkawm.

☞ Ni 11.5.2012 khan 6<sup>th</sup> Inter Branch YMA Basketball tournament 2012 chu Zarkawt Recreation Centre-ah Asst. Secretary Pu R.L. Rindika, Central YMA-in a hawng a, he tournament-ah hian Team 61 an chhuak.

☞ Ni 12.5.2012 khian Central Executive Committee chawhma dar 11-ah an thukhawm dawn.

☞ Ni 2-4.5.2012 chhung khan Sub-Hqrs. YMA, Mamit Conference Zawlnuam Vengpui a neih hmanpuiin Vice President Pu Lalbiakzuala te, Pu Lalhmangaiha CEC te, Pu Z. Dengthansanga CEC te, Tv. Lalhmachhuana CEC leh Pu Lalsangzuala Sailo CEC te an kal.

☞ 2.5.2012 khan Mizoram Synod Social Front buatsaihin Pi Zaii Hall-ah Ruihhlo Do chungchanga inrawn khawmna neih a ni a, Central YMA aiawhin Pu T. Sangkunga, President, Pu R.L. Rindika, Asst. Secretary leh CADS OB te an tel

**MHIP**

Mizoram State Child Protection Society-in min ngen angin veng chhungah Naupangte chunga pawikhawihna leh hleilenna lo hluar zel tur laka kan inven theihnan Nu leh Pa te'n a hnuai a mite hi zawm theuh turin an ngen.

- 1) Naupang chu mahniin awmfal tir loh tur.
- 2) Zan khawthim hnuah dawrahte anmahni tirh loh hram tur.
- 3) Hmel hriatloh te neltir loh tur a ni a, hmelhriatloh te'n thil an pek leh leisakin lak duh loh nachang hriattir tur.
- 4) Naupang mahnia in nghahtir miah loh tur.

**Champhai Lawmthu**

Champhai District Football Associationte chuan MFA Cup wavi 13-na khelh zawh taka Chanmari West Sporting Club-in a mikhual danah lawmthu kan sawi. A tir atangin thlenin ruahmanin min lo hmuak a, Chanmari West Branch YMA-ten Zawlbuka riahkhawm min lo phalsak leh zel bakah, Local Council-ten min rawn tlawh a, sum leh paia min tanpui avang pawhin kan lawm hle a ni.

Upa H Suanate chhungkaw chungah leh kan Local manager Pu H Lalramhluna'n kan harsatna tinreng min sutkiansak a, kan inkhel min tawiawm zel avangin kan lawm takzet a ni.

Valtea, Manager

Champhai District Football Association

**Property Committee**

☞ Section tin ten anmahni section chhunga an au zawh hian Branch switch lama thlak theihngihl lo turin an ngen a, heng point hrang hrangte hi enkawl uluk theuh turin an ngen bawk.

☞ Information Mike chhia a awmin section hruaituten chairman Pu C. Lalmuankima Ph No. 9862142362-ah a rang thei ang bera hriattir tur a ni.

☞ Kumin chhungin wavi 12 an hnatlang tawh a ni.

**Inkhel leh intlansiak**

Pathianni zan hian 2011-2012 English Premier League season zawh a ni dawn a, dar 7:30 atangin team 20-ten an khel rual vek ang.

Manchester City-in hma hruaiin Manchester United nen point 86 ve ve an hmu a, goal difference-ah +8 a tha zawk City-in an mikhual QPR an hneh a nih chuan 1968 hnuia a wavi khat nan English title an la thei dawn.

Chuti ni lova United-in Sunderland mualah an tum ang hlawhtlinna an chang a nih chuan a wavi 20 nen English champion an ni ang a, Alex Ferguson-a hnuia Premier League title an lak wavi 13-na a ni ang.

Hetih lai hian waviin tlai dar 5:30 atangin F1 Championship round ngana, Spanish Grand Prix an tlan dawn a, European season an tanna tur a nih avangin a pawimawh hle tura ngaih a ni.

**HRIAT ZAUNA**

YMA Park-a Silver Oak leh Zacaranda hi a par vullai a ni a. Silver Oak (*Grevillea roburta*) hi a engin a par a, April par (*Delonix regia*) f. leguminaseae hi a sen dangin a par thung, mawi tak a ni.

R. Thansanga RTS

**ZOFA**

☞ Ni 9.5.2012 zan khan Assam Rifle (Khatla) ah programme an nei a, Lam chi thum- Cheraw, Sarlamkai leh Chawnglaizawn an entir.

☞ North East Folk Dance Festival, Basar, Arunachal Pradesh -a tel turin Club member mi 14 te chu Leader Pu VL Thakima hoin an kal. Ni 12.5.2012 (Inrinni) khan programme an nei a, tum ang chuan Ni 16.5.2012 (Nilaini) ah Aizawl an rawn thleng leh ang.

☞ Ni 8.5.2012 (Thawhle) zan khan Dress chingfelin CVTTP Library ah an hnatlang

☞ Ni 22.5.2012 (Thawhle) zan atang hian veng chhung mi a duh apiang tan Hnam Lam zirna hun siam tum a ni a, helama tui mite chu lo ngaihven turin an inhriattir.

**LUNGHLU ROAD WELFARE**

Kar leh hun remchangah hnatlang koh tum a ni a, member zawng zawngte kim taka he hnatlangah hian thawkchhuak theuh turin an inhriattir.

**LAWMTHU**

Kan fapa, Lalfakzuala (22) Ni 20.4.2012 (Thawhtanni) a accident avanga boral chungchangah YMA-in tul tinreng min buaipui a, hun leh sum leh pai tamtak senga Kuang mawi tak nena min thalnaah lawmthu kan sawi tak meuh meuh a, kan chunga in thatna, tha leh zung, sum leh pai in sen zawng zawngte Lalpa'n a let tam takin rul che u rawh se.

In khawngaihna dawngtu

Upa Lenkhara,

Hmuntha, Kalaymyo, Myanmar

**COOK HNARUAK**

**Lois Bet Print & Publication,**  
Chanmari-ah Cook mamawh a ni a, a duh tan chuan May ni 14 chhun dar 12:00 hmain ngaihven tur a ni.

Manager

Lois Bet, Phone-9612165518

**LG & SAMSUNG**

**EURO SPECIAL DISCOUNT**

TV, LCD

Sukam Inverter kan nei bawk

i - One Multi Brand

Vaivakawn, Zotlang peng

(4-1) Ph. 9862492830